

Scheibenschlagen

2013

Nachname Vorname

Löschgruppe Graf-Gurnau

Grafer Kapelle

Liabe Leit, heint mecht mar enk olla schia begrießa,
wos d' rnoch iatz kimmt, sell kuan verdrießa.
Noch oltem Brauch tia mar ou Böller schiaßa.
A Verübl, dös war ins gor it recht,
a Hetz muaß sei, wega dem tia mar's decht.
D' Fuirwehr tuat enk in dr Noat olli halfa,
drum seits it beas und lot'sas galta.

Die earscht Scheiba, die hella,
keart dr Grafer Kapella.
Daß dr hl. Johannes von Nepamuk weiterhin über ins wocht,
und in dr letschta Stund für olla a Fürsproch mocht.

Da Böller hobts keart, iatz gia mar's on,
zearscht keima huiru d' Grafer dron.

Bürgermeister & Vize Lutz Thomas Sieß Reinhold

Mit deara Scheiba, dia miar iatz außa schießa,
tia mar in Bürgermeister uns sein Vize begrüßa.
Wie es ja alla wisst, steat Fuirwehrrhalle on zum Renoviera,
den nuia Plan homar kenna im Herbst in dr Gemeindestuba inspiziera.
Der geplante Zubau gfollt ins recht guat
lei no a Heizung in dem Konzept ins fahla tuat.
A Schnapsli enk Grafer Fuirwehr iatz spendiert,
damit nit viel Zeit beim Umsetza es verlierts.

Fam Hotz Oskar Edith

D` Oskar tuat jeda Montag im G` straudi Korta spiela´
da kann ma nit dr huam am Sofa liega.
Jeden Montag muaß er dahin,
er denkt si wenn i lei wieder gwinn.
Edith isch in der Grafer Kapella fest ongaschiert,
im Oktober und Mai wird da betet jeder kann da mittian den's interessiert.
Mir wüscha enk no viel Glück im nuia Jahr,
iats lassa no a Raketa fliega wunderbar.

Hotz Hannes

D`r Hannes tuat fest Hotel und Häuser plana und skizziera,
aber ou als Bauaufsicht da Rohbau inspiziera.
Als Architekt hat ma viel zum Denka und kontrolliera,
da darfsch nu nit da Überblick verlierera.
D`Fuirwehr spendiert deiner Firma iatz zum Schluss
a schiane Scheiba mit ama morz Schuss.

Hotz Lydia und Beate

Im letzta Jahr hoba d'Lydia und Beate Fenstera tauscht,
dass sie nit so viel Heizöl bei da Fentera aussa rauscht.
Viel Dreck war da schua zum Verrauma,
aber im Sommer sell ma ja ou kua Gäst versauma.
Lydia und Beate tiats enk nit viel uma hasta,
tiats o amol ausrasta.

Hönl Norbert

Dia Scheiba isch aussa aus der Gluat,
mir hoffe es geiht da guat.
Gsundheit, Glück und`s allerbescht,
wensch ma dir heint bei insrem Fescht.
S`Johr 2013 dir deis alles bringt,
und zum Schluss a Raketa in Himmel aussa singt.

Hotz Monika

D'Monika isch ou in der Grafer Kapella beim Vorbeta ongaschert,
sie betet ou aluan wenss pressiert.
Bei die Schifahrer im Fernseh isch sie alli dabei,
sie schaut wer isch am schnellsta oder wer fährt am Tor vorbei.
Monika tua dir no viel Aktivität kolta,
d'Fuirwehr weard dr nie a Scheiba vorentholta.

Nöbl Markus

6 Monat hats koaßa Habt acht
dr Markus hat beim Paras in ABC-Zug gmacht.
Dazu hat er alli auf Obsom obi miaßa
hoffentlich hosch nit miaßa um dei Freindin verdriaßa.
A gonze Woch war er in Tschechien ou mit dabei
da hats Bier um oan Euro geba - des war sicha fei.
In Seibersdorf hat er abschließat no a Prüfung gmacht
und de alls oanziger mit alle 1000 Punkte gschafft.
Mir tian dir dazu ganz fescht gratuliera
und lass dafür a Raketen in Himml aui marschiera.

Fam Hotz Martin & Maggi

Jo, dar Martin dear hot viel zum tian,
aso an haufa Socha, deas isch bald numma schian.
Aus deam Grund hot er o an Tausch vollbracht,
und beim Fuierwehrwechsel Nägel mit Köpf gmocht.
Miar winscha dar bei der Stadtfeuerwehr alles Guat,
und hoffa, dass dar die Arbeit o in Landeck fescht gfollla tuat.
Zum Schluss lossa mar iatz a Scheiba übers Brett,
und an Böller sell krocha dassas schnellt richtig fett.

Bar Melody

Von d'r Fuierwehrhalle in die Bar Melody isch es nit weit,
da geht m'a gera auf a Bier, ou die Grafer und Gurnauer Fuierwehrleit.
Nach oaner Prob kann ma sich deart gut austauscha,
und über die vergangana Proba und Einsätze plauscha,
Dass die Bar no länger die Gäst so guat g'fallt,
an Böller ganz laut knallt.

Fam Schröcker Hermann & Frida

Elfriede und Hermann haba sich guat giahn glat,
a Wocha im warmen Süden mit viel Essen und Sonne und was ma halt so im Urlaub
hat.
Sinsch isch ums Haus alli was zum tian,
so isch es in Graf o wunderschian.
Miar winscha enk no viel schiane Reisa,
iatz wera miar no a Böller ocha schmeissa.

Schröcker Evelyn

Hallo Evi brauchsch amol an Mann
dann rufsch uinfach bei Elite-Partner an.
Settasch ou mit ins Fuirwehrleit zfrieda sein
mir kehra gera auf a Springli bei dir ein.
Mir hoffa du tuasch des Sprichla ou vertroga
sinsch konsch as ja beim Kassiera ruhig sogä.

FA Walch + Plannger

Bei d'r Firma Walch und Plannger, wia nit olle wissa,
dort weare die tollschten Pläne gschmissa.
Deas Büro isch in Fochkreisen guat bekonnt
plant weard do für Projekte im gonza Lond.
Sette miar amol an Rot braucha fürs Baua,
weara miar ba enk nochä vorbeischaua.
An Böll'r lossa miar iatz nou krocha
mochts weiterhin nou viel guati Socha.

FA Streng

Die gelba Auto, wia jeder woäß
sei vur Firma Streng überoll auf d'r Stroß.
Ob im gonza Lond oder z'Starkaboch
gloda hoba si olli bis über's Doch.
Und wia miar g'heart hoba tuat dia Firma ou umstruckturiera
und sich nou viel mia für die Privata ongaschiera.
An Böll'r lossa miar iatz nou krocha,
daß ou dia Bagger olli a guati Orbat mocha.

Ruetz Getrud

Iatz steigt amol a Raketa au,
die Gertraud hom mar huira bei ins s'erste mol auf der Lista drau.
Aber Gertraud, wos sell mar über die schua schreiba,
wenn mar nit mol wissa wo die tuasch umma treiba.
Miar hoffa dass ma die öfter z' Gsicht kriagt,
auf dass die Scheiba no wie oa fliagt.

Heimhilcher Manuela & Franz Elisabeth

Was sella ma der Manuela und dr Elisabeth schreiba,
da bisch als Sprichli schreiber wirklich nit zum beneida.
Nuit heart ma sight ma,
deis isch a Gfrett,
wenn ma enk lei amol secha tat do oder det.
Deshalb tia ma die negscht Scheiba,
ganz, ganz weit aussu treiba.

Sailer Christian & Patscheider Karin

Den Christian und di Karin tia mar bei ins recht herzlich begriässa,
und ihna a Raketa weit aui schiessa.
Long hoba dia zwoa um a Haus gschaut,
und in Graf hoba si nocha Glück ket und glei anständig umbaut.
D' Arbeit war viel da hot ma ket kua Rui,
dafür isch iaz alles so guat wie nui.
Mir hoffa enk gfallts in Graf guat,
auf dass mir enk a Scheiba ausi hola aus dr Gluat.

Fam Matt Egon Annemarie

Ou deas Jahr wissa mar wieder wos übern Egon zum schreiba
und dabei sollts ou bleiba.
Speziell dein Bua steat auf Fahrzeuge und Motora,
nur fehlt ihm das Kleingeld, aber darum gibt's ja Investora.
A cooles kleines Motorrad hosch ihm in die Garage stella kenna,
a so a Gaudi darf sich der Patrik schua gönna.
Dass dr Nachwuchs unfallfrei um jede Kurva tuat biega,
lossa mar iaz a Scheibe weit ocha fliaga.

Jäger Michael & Zangerl Sandra

Im Parterr beim Matt Egon sei Haus
gia die zwoa in und aus.
Seicha tuat ma si fascht nia,
deis isch für ins nit schia.
An kluana Splen tiats es zwoa hoba
mit so amerikanische Woga.
Beim negschta Festli, tiats jo dabei sein,
dies war fein.
D` Finger tian ma iatz weah vu lauter schreiba,
drum tian ma oan Böller anreiba.

Matt Christian

Dr Christian entwickelt sie zu anam wahra Talent beim Organisiera,
die Weihnachtsfeier mit dem tolla Catering - mir kenna lei gratuliera.
Nur d' Weiberleit hot er nit gonz im Griff,
es funkelt da und det, aber es scheint es fahlt der letschte Schliff.
Deas weard schuo ou bald passa,
für ins isch wichtig, dass du hasch im Griff die Fuirwehrekassa.

Maidel Wilfried

Dr Willi isch beim Haus umbaua
wenn´ s fertig isch weara ma kema schaua.
Da muaß er viel Zeit investiera
damit er kann so an Umbau realisiera.
Aber er hat ja zwoa gschickte Händ
da werd der Umbau bald finda a End.
Mir hoffa es habts im umbauta Haus a guate Zeit
drum spendir ma enk a Raketr heint.

Maidel Johann

Die Scheiba tian ma weit außi treiba
und tian beim Johann stian bleiba.
Hoba tuat er zwoa fleißige Händ
und bei dr Baustell vom Bua er jeds Eggli kennt.
Zwischen halfa auf der Baustell - des weard miaßa ou so sein
fahrt er sei nuis Auto ein.
An Böller iaztz no laut kracht
damit die Auto dir viel Freid macht.

Fam Schmid Robert Monika

Dr Robert ma tats nit glouba,
der hot a Bar im Haus und des isch nit glouga.
D' Fuirwehr sucht a Platzli , wenn miar d' Halle renoviere beim Umbau
dein Kaller tat ins passa da gonz genau.
Da hattesch an morz Zugang , holt nit soviel Nutza
miar tata schua halfa beim aufräumen und putza.
Iatz wünsch mar enk nou viel Gsundheit
die Scheiba sett außa schweba gonz weit.

Fam Nitsche Kurdoglu Gerald Brigitte

Gerald iatz isch aber d'Zeit wirklich kema,
dass ins tuasch amol an Orbeit abnehma.

Miar tia für jeden Grafer und Gurnauer a Sprichli dichta,
deas kanntesch decht im Handumdreha ou verrichta.

"Miar Oberländer.." am morz Schwarta Mundart aus deiner Feder kimmt,
so wie a guats Schnapsli beim Brenna ocha rinnt.

90 Jahre "Dada" (Dadaismus) in Tirol - Gerald bisch eh da,
nou da, ou da, wieso da, gar it da, no immer da- eija eh da.

Fam Horvath Erich Elisabeth

Wos in Grins vor der Schlosserei steht, werd it glei jeder verstiah,
mir hoba kehr es wert um an Albigen giah.

Noch dem Entwurft vom Erich wert der gmocht,
und anschließend auf den Wonderweg brocht.

Erich miar wünscha dir gutes gelinga,
und lossa für dein Projekt a Raketa in Himml singa!

Fam Horvarth Thomas Denisa

Dr Thomas hot a Aqarium,
da schwimma die Fischla lei so umadum.

Dr Hund tuat sie dafür nit interessiera,
lei Katza vom Erich kannt den Bestand reduziera.

Im Cafe Bar Melodie findet ma die zum politisiera,
mir vu Fuierwehr tia dr jedenfalls a schiane Scheiba spendiera.

Horvarth Martha

Bei der Martha sieht ma olli da Hund am Gartazaun stia,
da traut ma sich gar nimmer die besucha gia.

Mir hoffa du tuasch da Hund in Gorta zittiera,
wenn mar noch kema zum kassiera,

Iatz lossmar no a Raketa in a Himml treiba,
dass in's no long gsund tuasch bleiba.

Autohaus Zangerl

Dr Roland und dr Ingo hoba nit nu nuia Auto zum Verkoufa,
si schaua ou, dass di Gebrauchta guat loufa.
Inser Fuierwehrauto isch bei enk in da beschta Händ,
dia Mechaniker schaua drauf, dass des Gefährt einwandfrei rennt.
Si schoffa des, dass ma noch'm Service mit dem olta Korra,
über's Johr konn ohne Reparatur tadellos fohra.
Drum Leit, mir kenna des Autohaus beschtens empfehla,
tiats ou enkare Woga zum Ingo und zum Roland auf Grof auBa stella.

FA Getränke Wille

A schiani Scheiba isch ins des schua weart,
dass d'Firma Wille z'Grof do steaht
Do kenna miar inser Gsöff ou z'Grof da koufa
und braucha gor nit weit loufa.
Geba tuats bam Wille so ziemlich olls,
wos flüssig isch und passt in an Hols.
Und dia Bedienung isch olli freundlich, sall muaß ma sogaa,
drum tian mar zur Scheiba ou nou a Raketa auchi joga.

FA Wille Harald

A Raketa lossa miar iatz aussi mit'm Fuirwehrsega
und tian bam Wille Harald an Stopp inlega
Miar tatan jo gonz geare ploga,
ober vom Harry tuat ma nuit d'r froga.
Er weard schua ollas huamlich mocha -
dia uana und die ondara Socha.
Viel Erfolg und a guates G'schäft winscha miar
beim Kassiera keama miar eh nocha zu Dir.

FA HW Bau Graf

Im Baug'schäft isch dia Firma bestens bekohnt
Tol aus Tol in im gonza Lond.
Auf dia Scheiba lossa miar nou a Raketa drau
Weil bam HW Bau z'Grof gibt's ollas für, n Bau.
Ob Zement, Eisa, Putz braun oder weiß,
dös ollas zu ama guata Preis.
S' Personal isch ou aolli freundlich und nett,
drum sett dia Scheiba weit aussi vom Brett.

Kathrein Anni

In Andacht und in Stille mechta mar iatz verweila - miar sei bereit
für'n Pammer Herbert geba sei letschtes Geleit.

Auf deiner letschten Reisa,
sell insere schianste Raketa dir den Weg iatz weisa.

Anna setasch a Hilf braucha
kimmsch uinfach zur Fuirwehrhalla aucha.

Last Stephanie Sonja

Deas Johr darfa mar zwoa neue Damen auf inserta Lista begriäa,
und lossa aus dem Grund glei a Raketa schiaäa.

So wias mir drfrotg hoba sei sie ursprünglich aus Deitschland,
und wohna iaz beide ins Graf dauäa beinand.

Dia Scheiba tia mar iaz weit auäa treiba,
und hoffa dassats eas long tiats bei ins da bleiba.

Fam Thurner Udo, Evelin

A mobile Hundeschul isch iatz der nui'e Renner
denn zum Abrichta braucht mar Profis und richtige Hundekenner.
Vo dem Hund vo de miar iatz reda, isch an Terrier und auf Carlos heart.,
Und dr Evi und im Udo keart.

Iatz brauchat's numma aufn Abrichtepaltz giah,
miar kenna deas schua verstiah.

Dass enk die Hundedressur ou guat gelingt,
iatz no a schiane Raketa aua singt.

Fam Ruetz Markus Christine

Der Johannes tuat ins seit nuiestem mit seiner Mitgliedschaft sehr unterstütza,
und isch da Feuerwehr an groäa Nutza.

Bier, Schnaps und Wein, darf laut da Eltern nit sein,
dafür lada mar ihn auf ua oder andere Limo ein.

Die Christine tuat an "Montesori-Kurs" besuacha,
und tuat ins dann alle sogä wia ma Kinder aufziacht ohne fluacha.

Enk sett des nuie Jahr viel Glück bringa,
drum tian mar iatz die Scheiba auäa schwinga.

Wagner Walter Ingrid

Spanien, Türkei und Griechenland,
sein für die Familie Wagner immer interessant!
Ihr Grafer Feriendomzil kost nit viel,
und isch baut in sehr familiera Stil.
Dass sich deas ausgeht Graf nit zu vergessa,
tuat ins gfreia nebs enkera viela andera Interesssa.
Enk set deas Jahr viel Glück bringa,
drum lossa mar iaz a Scheiba ocha singa.

Moschen Anni

Die Anni tuat alli fleißig aufs Kapalli schaua
da kann ma ganz fest auf die Anni bauer.
Deas Jahr hots aber wos neues beim Kapalla geba,
iaz erwacht die Glocka zu Mittag selber zum Leba.
Somit hosch uan Weg am Tog weniger zum mocha
aber deas tatasch ja locker pocka, deas war jo zum locha.
Viel Gesundheit wünsch mar dir ou fürs nächste Jahr
und dia Scheiba fliagt iatz weit deas isch ja klar.

Moschen Norbert & Emilia

Beim Nobert tia miar ins sagrisch ploga,
weil miar umfach nix tia dr'foga.
D' Emilia tia miar no nit wirklich kenna,
und in'd Steiermark mechta mar nit ocharena.
Zum Einreichplan für'd Fuirwehrhalle kanntesch ins no a paar Tipps geba,
mir lossa dafür a schiane Scheiba übern Talkessel segla.

Haas Lisa

Vu dar Lisa isch ins nit viel bekonnt,
seacha tuat ma sa nia bei ins im Lond.
Was sella mar denn ins Sprichli schreiba?
Iatz schiaßa mar amol zerscht a schiane Scheiba.
Und s'negscht Jahr gibsch ins a Instruktion,
dass mar wissa über die Situation.

Mangott Silvia

Von d'r Silvia deas Sprichli isch olli schwar zum schreiba,
weil mir nit wissa woa du tuasch di alli umchatreiba.
In Zukunft miaßa mar wahrscheinlich an Spion engagieren,
um a poor guate Gschichtla vo dir zu lukrieren.
Mir schika iaz a Scheiba übern Berg,
auf dass ma im negschta Johr mia von dir heart.

Kirschner Katharina

Die Katharina wohnt schua sei längerem in Grins,
und zwor im Altersheim und numma bei ins.
Do douba gibt's gnuag zum erleiba,
drum dirft's bei dir kua Longweil geiba.
Dia sett deas neue Jahr viel Gesundheit bringa,
drum lass mar a Scheiba den Higl ocha springa.

Fam Nöbl Ferdinand , Romana

Der Ferdl und die Romana, so miaße miar schua sogä,
weara sie iatz nochä mit ama Computer umchaplogä.
D'Romana hat si d'rfür schon öfter für an Kurs interessiert,
Weil bis iatz nou kuaner z'Stönd keama isch, isch ou nit passiert.
Dear Computer isch olli nou einpöckter im Koschta,
er weard nit besser, ober er hot's ruhig und könn ou roschta.
Hoffentli könn d'Romana da negscht-beschta Kurs b'sucha,
nochä könn sie halfa, dem Ferdl im Internet Werkzeug suacha.
Und daß dr' zua nochä ou die Poschtleitung guat funktioniert
für enk iatz nou a Raketa marschert.

Nöbl Hannes

In Vorarlberg hat sich d'r Hannes schua ganz guat einglebt,
lei leatscht's Jahr hat'r nit so a schianes Erlebnis keat.
Aus d'r Wohnung vom Nachbar hat'r an komischen Geruch vernomma,
da hat sich dann glei die Polizei d'r Sach angnomma.
Deas war sicher nit schian,
wenn ma sieht die viela Leit in d'r Nachbarswohnung umchatian.
D'r Hannes tuat sich aber ou fleißig sportlich engagiera,
und jeden Montag beim Fußball sei Technik und Kondition trainiera.

Fam Schlatter Engelbert Stefanie

Vom Engl und d'r Stefanie tia mar dr' froga
sie tian nou wohl viel Motorradli fohra.
Nu hot d'r Engl do a Prinzip,
die erschta tausend Kilometer nimmt er d'Steffi nit mit.
Ma kann denka wos ma will, mir kenna di nou loba,
weil ersch wenn du sicher bisch, hockt d'Stefanie ou wieder doba.
Zudem tuat er sich für die Feuerwehr recht ongagiera,
und tuat neba Schnaplsa ou Arbeitsleistung spendiera.
Im Winter miaßa mar ins kuane Gedanke übers Schnearauma mocha,
deas mocht dr Engl neba viela ondera Socha.
Deas Jahr hot er ins zudem deas Holz vom Nussboam beim Kappala kloaba,
die ganze Angelegenheit wor generell toll betroga.
Dass die weiterhin tuasch so stark für ins ongagiera,
lossa mar iatz no a gscheide Rakete marschiera.

Schlatter Harald & Melli

In seim Job muaß d'r Harald die ganze Woche friah aus'm Bett,
deas isch machmal sicher a bissli a G'frett.
Wenn'r dann amol länger im Bett isch glega,
sein schua glei die Hanna und Lena zugega.
In Papa auf d'r Fußsohle kitzla isch a große Freid,
da kann d'r Harald nit länger liega bleiba, deas isch aber sicher ou nit blead.
So muaß deas aufwacha sein,
da tunkt oun d'r Tag glei ganz fein.

Perktold Michael

Mit dia poor Zeila wella mar ins amol beschweara,
vu dir kriagt ma ja überhaupt nix zum heara.
In Zukunft miaßa m'r wahrscheinlich an Spion engagiera,
um a paar guate G'schichtla vu dir zu lukriera.
Miar schicka iatz a Scheiba übern Berg,
auf dass ma im negschta Johr mia vu diar heart.

Fam Kobler Gerald & Gabriele

D'r Gerald und die Gabriele sein in Graf gera umanand,
da kimmt deas ganz gelega, so an Adventstand.
Bei am Glühwein kann ma an netta Ratscher macha,
und mit die Nachbarn gemeinsam über die neuesta G'schichtla locha.
D'Fuirwehr kann enk in Zukunft hoffentlich wieder bei am Festli begrießa,
mir globa ja es tiats schua a bissli verdrießa.

Kobler Maria

Mit dera Scheiba tian m'r bei d'r Maria stiahn bleiba,
und no glei an Böller anreiba.
Mir wünsch d'r für huira s'allerbescht,
und denka an die, bei inserm Fescht.
Maria tua weiter auf dei Gesundheit schaua,
d'Fuirwehr mecht d'r no viele Johr a Scheiba ocha haua.

Traxl Richard

Die Scheiba tian ma weit außi schiaßa
und damit in Grins in Richard grißa.
Ma sicht di nimma viel tunta bei ins
des hoßt es gfallt dir guat doba in Grins.
Fürs Jahr 2013 wünsch dir d' Feierwehr a guat Zeit
viel Gesundheit, Glick und Zfridaheit.

Plattner Kathrin

Jedes Jahr treibts ou die Kathrin anan Gardasea
aber iatz muas ma numma Battelboot fahra wia amea.
Sie isch selber mol in a Fahrschual spaziert
und hot brav die Reglen fürs Motorbootfahra studiert.
Iaz kann sie stolz mitm Boot a poor Typen aufreisa
und wenn dann uaner nit passt kann sie ihn ou schnell übers Boot schmeißa.
Seit neuestem isch die Kathrin an Stock tiefer inzoacha
und hot sich dafür natürlich ow miaßa das ua oder andere Möbel koafa.
Dia Scheiba tia mar iaz weit außa schiaßa
und hoffa dass an Stock tiefer nit tuasch verdrießa.

Plattner Christian

Da Christian sigt ma mit'm Fc- Pians olli fleißig trainiera,
um darnach im Tor die Balla zu pariera.

Nebam Fussball bisch ou nou bei dar Fuierwehr darbei,
und do moch' sch du ou so allerlei.

Im Zuge vom Bundesheer hosch du huira jo a poor Kurse mocha kenna,
so darfsch die iatz Atenschutzträger, Maschiniest und z`letscht no Hallenwart
nenna.

Und o beim Ausflug darf dr Christian nit fahla,
do hot man gseicha im Hochseilgorta uma krahla.

Ou beim Flying Fox isch er ocha gschossa,
darnoch beim Essa hom mar ou no 1,2 Bierla genossa.

Lei über die Menge mias mar no s' negscht mol reida,
Vielleicht muasch die nocha nit im Auto übergeiba.

Bei dar Arbeit tuat er sich als Ingeniuer beim Maschienebau konzentriera,
Auf a netts Johr 2013 loss mar die Scheiba gscheid ausa marschiera.

Fam Plattner Wolfgang Angelika

D' Angelika wor s'letsch Johr viel auf'm Ries.

Kema isch si auf Wian und sogar bis noch Paris.

Im Summer ober, do weilt si mit ihrem Schotz
wia jedes Johr am Gardasee auf'm Campingplotz.

Im Dezember hob mar in dr Zeitung glesa,
do isch si bei der Leistungsgemeinschaft unter da Gewinner gwesa.

Wos si gwunna hot, hommar nit kenna drfoga,
do tuat ins no a bissli dr Wunder ploga.

Di Plattners hoba ou ihren Fuhrpark auf Vordermonn brocht
An BMW X5 steacht iatz vor'm Haus in seiner gonza Procht.

Pfeifer Anna Vogel Benjamin

Die Anna und dar Benjamin wora recht gestresst,
isch decht in ihrem Haus foscht kua Wasser gwesst.

Dar Druck dear wor leider viel zu gering,
deas isch holt ou nit fein liegt ma grad in dar Wonna drin.

A Eckventil hot ma als Schuldigen gfunda,
schnell repariert isch deas Wasser schu wieder grunna.

Selltats no amol Probleme mitm flüssigen Elemt hoba,
kannta ma renk a paar 10-Liter Kübel ins Haus icha troga.

Fam Senn Arnold Ursula

Der Arnold , als Imker vor Soga, wie ihn jeder kennt,
an Haufa Bienastöck er sein eigen nennt.
Nu tuat er ober schuan onfonga reduziera,
d'r für ober mian auf's Züchta konzentriera.
Königinnen züchta tuat er, isch jo allerhond
d'rfür isch er schua bekonnt im gonza Lond.
Daß dös guat gelingt, und dia adelige Viechle ou viel bringa,
lossa miar für die und d'Ursula ou a Raketa singa.

Senn Evi

D' Evi isch olli no gemeldet in Grins fürwahr,
aber umgiah tuat sie in Wattens des isch ins eah klor.
Mit Swarovski- Stianla tuat dr. Tom d'Evi verwehna
und mit in Urlaub auf Australien nehma.
In Innsbruck im MCI schmeisst d'Evi schua teils da Loda
und tuat die Studenta zum Berufsschnuppera bei so mancher Firma inloda.

Fam Senn Werner Brigitte

Der Olltog voll Hektik und Stress, es isch an Graus,
drum schoffa si die Senns an Wellnesstempel im eigana Haus.
Di Brigitte hot über olles die Bauaufsicht,
an Haufa Dreck ober am End a super Gschicht.
Dr Werner hot bei seim Auto da Hänger dron,
und transportiert weiße Kübl, der guate Monn,
Ins isch do kema zu da Ohra,
daß er vom Perjentunnel auße di Hälfte hot verloara.
Schnell losst er s' Auto stiah am Stroßarond,
und sammelt dia Kübl in, dia do liega auf der Stroß umanond.
Jo Werner, des passiert ou am Polizischt,
der des mit der Lodesicherung eigatli besser wischt.
Loss di's nit verdriaßa und hock di mit dr Brigitte, deiner feschen Biene,
gmiatli in di nogelnuie Infrarotkabine.

Senn Anna

Di Anna isch di älteschte Grof-Gurnauerin,
ober deswega schwächla kimmt ihra nit in Sinn.
Si rechnet jeden Tog an Zopfa, des holtet s' Gedächtnis fit,
do kam so manch Junger nu mit'm Tascharechner mit.
Di Kinder hoba ihr z'Weihnacht an Relaxstuhl gschenkt,
dass si beim Fernseh-Schaua gmiatli liega konn, hoba si sich hold denkt.
Ober d'Anna, des tatsch nit globa,
hot den Stuhl glei wieder auf'd Seita gschoba.
Do kam si in Versuchung und tat öfter am Tog a Raschterli mocha,
und wer rastet der rostet, des seia in ihrem Olter no kua Socha.
Anna, die Scheiba tua mar weit auße treiba,
tua ins no weiterhin so fit und munter bleiba.

Senn Verena

Immer no tuat die Verena auf dr Uni in und aus spaziera
doch mehr und mehr tuat sie sich am Ausland interessiera.
Seit Herbst tuat sie in Frankreich die Uni unsicher mocha
egal ob dr Christian da eppas hot zum locha.
Z'Weihnacht hots as sie wieder kurz in die Heimat zoaga.
Aber nit lang dann isch sie wieder retour gfloga.
No a Semester hot sie in Frankreich drann kengt.
Kua problem so longs das Budget nit sprengt.
Mir tian iaz a Scheiba weit auße schieße
Und hoffa du tuasch nit verdriaße.

Senn Michaela

Dia Scheiba geba mar für di Michi aus
dia bugglt schua zwoa Johr in Zoms im Kronkahaas.
Do learnt si wia ma da kronka Leit
Bluat obnimmt und Spritza geit.
Im Summer mecht sie geara auf Malle fohra,
obr nit allua, sie mecht schua alle dabei hoba.
Die ganze Familie inklusive Freund,
Zrug kema weara sie nocha voll gebräunt.

Vollath Hubert

Dr Hubert tuat sich schwar beim fahra mit seim Wohncontainer,
drum sein di Ausflüg mit seim Traktor um so schöner!
Tua um den bleada Zettel it gar a so verdriaßa,
du kansch ja weiterhin mit dem griana Geschoss umma schiaßa!
Und wenn der amal numma fahrt und lei mia steat,
hasch ja 2 gsunde Fiass dass es z` Fuaß weitergeat!
Iatz tian miar di nit weiter ploga,
und dir a Schaiba weit,weit ocha schloga!

Walter Berta

D' Berta tuat Gsundheit a bissli ploga,
so wella die Füß sie nit alli troga.
Aber Berta isch hort im nehma,
deas Hüftglenk weard schua wieder kema.
Die Muschgla baut sie wieder auf,
do kansch wetta drauf.
A schiane Raketa lossa mir dir iatz steiga,
set dr halfa die Wehwehchen auszumtreiba.

Fam Walter Markus Sybille

Die Sybille hat mit ihrem Auto alli an Haufa Kilometer ocha gspualt,
und oft im Paznaun die Stroßa aufgwualt.
Um den Außendienst einigermaßen zu minimiera,
hot sie sich denkt, i darf iatz kua Zeit mehr verlieria.
Ja in Kappl gkeara wohl viele Leit gschoara,
drum hosch du an Salon aufgmocht, Zeit ischas gwoara.
Iatz keama nou mia Leit in den Genuss vu schicke Haar,
was bis iatz ja lei in Gurnau möglich war.
Dass dein nuier Loda ou guat floriert,
iatz für die no an Böller explodiert.

Schütz Manuel & Petrovic Regina

Im Manuel und dr Gini miassa miar iatz amal ganz fescht zur Hochzeit gratuliera
und lassa a morz Raketa in Himml aui maschiera!

Im September haba si sich endlich traut,
und es hat alles tiptop hinghaut!

Nach dem Offiziellen Teil im Schloss,
sein si auf Trams, zammt m ganza Tross!

Gfeiert haba sa bis spat in d` Nacht,
deas kann der Manuel guat,deas war deacht glacht!

A andere morz Anschaffung hatt`s bei ihna ou nou geaba,
miar hatta nit gloabt dass mar deas nou derleaba!?

Statt dass er sich in seinen KA an Kindersitz montiert,
hat sich der Manu an nuia Kombi spendiert!

Du hasch da Kombi sicher nit ohne Grund koaft,
weil zwischa frisch Vermählten sicher no was loaft!

Auf deas dass s` nuie Jahr enk ou wieder glücklich macht,
iatz an Böller nou ganz laut kracht!

Fam Schütz Erwin Christine

Nachdem's Haus isch fertig renoviert mit viel Einsatz und Kraft,
haba sich d'r Erwin und die Christine a neus Auto an'gschafft.

An Hyundai sieht ma iatz durch Gurnau flitza,
mir hoffa es fahrt's nit zu schnell und lasst's enk vom Manuel blitza.

Mit deam Woga dear iatz steagt vor'm Haus,
geagt enk dar Grip auf d'r Straß garantiert nit aus.

An Böller lassa m'r iatz no explodiera,
und hinta dran a Raketa in Himmel auchi marschiera.

Fam Haag Sabine u. Peter

Dr Peter tuat iatz a orange Vespa fohra,
des mocht Spaß und ma kann si ou an Sprit drspora.

In der family a zwoats Gefährt,
isch praktisch und an Haufa weart.

Als Frau im Haus mit drei Manderleit,
do braucht's an Ausgleich vo Zeit zu Zeit,
beim Yoga findet di Sabine Entspannung pur,
und kriagt dabei ou a elastische Figur.

Enker Scheiba tuat weit außa treiba
tiats nu weiterhin so sportlich bleiba.

Pfisterer Peter

Jo Peter, kann ma die überhaupt no an Österreicher nenna,
wenn du tuasch s´ holb Johr in Norwegen uma renna.
Do ma in Norwegen alla weil nit Arbeita kann,
isch iatz holt decht wieder Österreich dronn.
Aber ins tuat´s decht olli g´ freia,
wenn mar die bei ins do seia.
Und im Winter so hom mar keart,
spring´ sch olli mit da Touraski auf´ n Berg.
Auf dass ma die ou im Summer wieder zum seicha kriagt,
iatz die Scheiba no weit oa fliagt!

Pfisterer Dieter Christine

Waht's im Winter da Schnee ums Haus,
holtat's der Dieter dahuam numma aus.
Er pakt seine Touraski
d' Grinner Schihütta isch sei Ziel.
Do wird a Bierli trunka, diskutiert und ma tuat allerlei drfoga,
und nocha fohrt dr Dieter wia an Junga die Pischta ocha.
Für die Bergfreunda hat er sich eintroga lossa beim Klubrenna
mir lossa dir iatz dafür no an richtiga Böller anbrenna.

Wilhelm Karin & Ingeborg

Ja Karin, bei ins sein die Winter richtig hort und eißig,
drum bisch du o da gonza Herbscht alli so fleißig.
Deas Heizmaterial muaß ma ja guat präpariera,
damit deas Holz kann passend in Oufa marschiera.
Im nuia Johr viel Glück und a warms Haus,
darum schloga mar dir iatz a Scheiba durchaus.

Carpentari Carina

Jo wos sell mar über die Carina groaß schreiba,
sie duat sich vorwiegend die Zeit in Koppl vertreiba.
Du wohnsch jo schua mia oder wianiger drin im Paznau,
kant´ sch die ruig öfter ausa draua nach Gurnau.
Miar hoffa dass mar die wieder öfter zu Gesicht kriagt,
auf dess die Scheiba no weit oa fliagt!!!

Carpentari Julia & Kurz Alexander

Dr Julia hot ihr altes Auto numma taugt,
drum hot sie sich um a nuis um g´ schaut.
Gwoara isch´ s an Audi A3, da kann ma sich nit bekloga,
der passt wirklich guat zu diar, des kann ma so sogaa.
Nu kimmt ma ohne Ketta nit olli zu diar aua,
drum hosch iatz an Quattro, dem konsch vertraua.
Du hosch des Auto no nit long dei eigen gnennt,
bisch damit schua zum Falch in die Werkstatt grennt.
Gweisa isch´ s schua an greifbara Schoda, des kann passiera,
nu sett ma bevor ma a Auto privat kouft ou gründlich inspiziera.
Gott sei donk hosch vom Schoda no eppas zrug Erstottet kriagt,
auf dess dir des numma Passiert, iatz dei Scheiba no weit oa fliagt!!

Fam Carpentari Reinhard Marlies

Die Marlies und dar Reinhard mechta viel gemeinsam tian,
und beide wissa im Paznaun drin ischs schian.
Was liegt da näher als sich mitanand a Fischerkorta zkoufa,
und mit dar Ruata um an Stausee uma zloufa.
Die Marlies isch da anscheinend mit großem Eifer dabei,
sie nimmt deas richtig ernscht mit deara Fischerei.
Dia Scheiba steigt in Himmel aucha steil,
und mir wischa enk gonz laut "Petri Heil"!

Fam Carpentari Reinhard Michaela

Die Michaela, deas kenna ruhig alle wissa,
mecht uanmol im Monat a Zusammenkunft nit missa.
A gemeinsames Frühstück steahrt da aufm Programm,
mit an haufa Mädels und natürlich ohne Mann.
Und ab und zua follt deas Frühstück o aus,
dafür mocha sie an Ausflug in die weite Welt hinaus.
Zum Reinhard miaßa mar ou no kurz berichta,
Hygiene isch eppas, auf deas kann er nit verzichta.
Er kann richtig anfonga zum schnauba,
isch sei Übernachtungszimmer nit bis ins letschte Eck icha sauber.
Ou beim Frühstücka hat er manchmol an Hoagl und isst nit als auf,
schu gar nit wenn auf deam Teller liegt a Stuck Blutwurscht drauf.
2013 sell für enk a schians Johr weara,
dean Böller der iatz krocht set ma ou no in a paar Wocha heara.

Carpentari Jürgen und Sonja

D'r Jürgen isch als Vertreter mit seim Auto viel auf d'r Roaß,
da isch's oft recht g'fährlich auf d'r Straß.
Leatscht's Jahr isch's dann passiert,
du hasch dei Auto bei einer Kreuzung auf'n Vordermann platziert.
D'r Fahrer isch blöderweise nit auf d'r Brems g'standa wie mir globa,
und so hat's no glei 2 weitere Autos z'sammgschoba.
Zum Glück isch nit viel passiert,
d'rum ou glei an Böller ins Feuer marschieret.
D'Sonja isch seit ihrem neuen Job ou oft mit'm Auto unterwegs,
im Winter isch es bei ins mit die Straß aber oft ganz let's.
Deas tuat die Sonja aber nit verdrißa,
sondern die Ketta in Windeseile auf die Radla auchaschißa.
Zum Schluss tian m'r no an Raketa in Himmel auchi jaga,
und mechta im Jürgen für sei Arbeit in d'r Fuierwehr ganz herzlich Dankschian
saga.
Als Vizekommandant hasch dei Amt an Jüngere übergeba,
du bleibsch d'r Fuirwehr aber sicher erhalta in deem weitera Leba.

Sailer Gerhard & Brigitte

Vu Zeit zu Zeit sou ischas foscht bei jedem mechta mar sogä,
will ma holt a nuis Auto in dar Garage drin stiahn hoba.
Dr Gerhard und Brigitte hoba sichs gleiche denkt,
und kurz danach ihr nuis Auto auf Gurnau icha glenkt.
An Geländewoga in weiß hats Renna gmocht,
miar wissa lei nit, hat deas Auto die Brigitte oder in Gerhard mia anglocht.
Aber der Korra hilft natürlich nit bei alle Socha,
so Manchs muaß ma holt decht no vu Hond und vor allem z'Fuaß mocha.
So giachts eas ou beim schlechtaschta Wetter mitm Hund ausm Haus,
und dafür haua mar iatz a Scheiba durchaus.

Pekar Manfred und Sabine

Die Umwelt deas isch a wichtiges Guat,
drum ischas ou wichtig, dass jeder was tuat.
Die Sabine und dar Manfred giahn mit gutem Beispiel voran,
und mocha sich an ihre Heizung dran.
A groaßa Bohrung hinterm Haus,
und schu kimmt die nuie Heizung ohne Öl aus.
Mit Erdwärme hoaza dia zwoa iatz ihr Hitta,
da braucht ma die alte Ölheizung nitta.
Miar hoffa eas hobats as iatz wohlig warm dahuam,
und haua enk no a Scheiba übern Ruan.

Fam Pfeifer Karl Brigitte

Wie die Indianer hoba gket ihren Marterpfahl,
folgt ou dar Karl jeden Tog am gonz bestimmta Ritual.
A Zigarettta vorm Haus deas muaß schu sein,
damit ma startet in Tog icha fein.
In a nuis Firmenfahrzeug hat ma ou nou investiert,
und dr Karl iatz an VW Multivan umakutschiert.
A feines Johr winscha ma enk zwoa,
und schiaßa glei a Scheiba durcha.

Öttl Wolfgang Christina

Die Zeit vergeht ma tat's nit glouba,
schu zehn Jahr wohna sie iatz auf dr Soga douba.
2003 hoba sie's 'Haus baut,
nocha glei amol auf'n Nachwuchs gschaut.
Um d' Anna draht sie viel in ihr'm Leiba,
lei so konnsch dem Madla für spater eppas mitgeba.
Miar winsch enk iatz s'allerbescht.
Und a schiane Scheiba kimmt iatz z'lescht.

Würthenberger Claudia u. Armin

An Haufa Kinder ums Haus, deas isch a tolle Gschicht und recht fein,
wenn sie lei olle in dar Schual guat sein.
So mancher braucht aber enkare Hilf und eas tiats deas geara,
alle dias braucha in Englisch und Mathematik lehra.
Dafür mehta ma enk a Lob ausprecha,
und weara glei a Packung für an Böller aufbrecha.
Dr Armin ou im Sport an gewissa Ehrgeiz hot,
und seine Ski beim Weiße Rausch in St. Anton ins Tol ocha lot.
Lieber Armin, settasch deas wieder mocha passt dar guat auf,
dass dar kuan onderer steigt auf deine Ski drauf.

Fam Landerer Franz Elfriede

Der Franz isch wirklich engagiert,
weil er sich für bedürftige Menschen interessiert.
Im Kiwani Club versucht er Guats zum tian,
aso a Aufgab isch sicherlich anstrengend aber o schian.
Nach der Operation winscha mir dar Elfriede nu deas bescht,
und hoffa die Genesung schreitet vorwärts recht fescht.
Zum Schluss haua mar nou an Böller drauf,
und winscha ins dass du bald bisch wieder wohl auf.

Fam Marth Edmund Helene

Deas Rentaleba hot d'Helene sicher schua guat im Griff,
do hot si sogor Zeit und geht a Wocha aufs Schiff.
Do kreuzt sie durchs Mittelmeer bis in die Türkei
und isch ou ba mancher Hetz d'rbei.
Und mit'm Edi und dem Enkala spaziera giahn
isch noch a ou wieder schian
Jo, so sett ma die Freizeit genieß.
drum tian d'rzua nou an Böller schiaß.

Fam Schultes Hubert Brigitte

Zerscht amol wella mar dr Gitti fescht gratuliera
und zum runda Geburtstag a schiane Raketa spendiera. (60-er)
Dr Hubert isch ja als olter Musiker bekannt,
deas Ziechorgali liegt 'm no sicher leicht in dr Hand.
Beim Grillfeschtli im Sommer in Graf deis war an Hit
nimsch dei Instrument huiru einfach mit.

Vogt Herta

D' Herta schafft's Leba mit Bravour,
aber hin und wieder keart her a gscheida Kur.
Im Ausland lasst si's leichter verwehna,
so isch sie ochagfohra zu dena Slowena.
Den Kurschatta den tia miar aber no nit kenna,
verdächtig weards lei wenn wieder tuasch noch Slowenien renna.
Aber miar mechta di iatz nit länger ploga,
und wera dia Scheiba weit ocha schloga.

Vogt Irene

Die Irene isch, so wia mar sie kenna,
olli fleißig beim umanonder renna.
Im Summar sigt ma sie spaziera gia,
und im Winter mit da Ski bei dar Bushotestell stia.
Du duasch hollt dei Leiba in vollen Zügen geniesa,
und des losch dar hoffentlich ou vo kuam ver miesa.
Mir hoffa dass du so weiter moch' sch,
iatz no an Böller laut für die krocht!!

Larcher Mathias u. Simone

In Mathias, ma tat's kaum globa,
sieht ma im Winter olli öfters auf die Berg doba.
Mit'm Robert beim Schitraining deas muaß sein,
damit ma isch beim Vergleichsrenna ganz vorna dabei.
Miar haba keart du hasch ganz guat abschnitta,
und bisch wie an wilder die Pista ochigritta.
Daß die tuasch weiterhin so sportlich engagiera,
lassa m'r no an Böller explodiera.

Fam Larcher Peter Margret

Im Langez hoba si vorm Haus tiafi Löcher bohrt um zu erkunda,
und hoba weit dunta no Erdwärme g'funda.
Dia kann ma nocha im Haus nutza, dös kenna miar schua verstiahn.
Noch braucht ma numma in Kaller Holz schiera giahn.
Ums Haus hot er ober nou an Haufa Legga stiahn
do baut er nocha sicher wieder an Holzhüttli, gonz schian.
Daß dös nocha ou guat gelingt, d'rfür ou nou a Raketa singt.

Schütz Florian

Dar Florian hat a gonz a bestimmtes Problem,
ihn nervt eppas, und deas ganz extrem.
Die Feuchtigkeit in seim Auto nimmt überhand,
da bildet sich innen a nasse Wand.
Fascht wie in ara Tropfsteinhöhle schauts da aus,
da hockt sich niamand geara icha, deas isch an Graus.
Vielleicht setsch ja zur Belüftung die Fenster ausbaua,
oder sicherheitsholber glei mit'm Schlegl icha haua.
A andere Möglichkeit tat sicher viele schocka,
du kanntasch ja mitm Anzug vu dar Wasserrettung icha hocka.
Nocha sigsch im Winter o richtig aus,
iatz schiaß mar a Scheiba unter Applaus.

Schrott Werner Gudrun

Für ins'r Fuirwehrekassa lot der Bruder vor Sissy olli a Spenda hupfa,
drum tian mar d'rfiar ou a Scheiba aus d'r Gluat aussilupfa.
Huiru kimmt d'rzua ou no an onständiger Schuß,
weil der Werner mocht mit da Fünfer Schluß.
Da 60-ziger lot er onmarschiera,
d'rzua tian miar herzlich gratuliera.

Fam Schütz Egon Sissi

Da Egon sieht ma olli no beim TUI umarena,
der kann si uanfoch vo seiner Orbeit nit trenna.
D' Sissi hot sich den Schritt leichter gmocht,
si isch iatz in Pension, des war decht glocht.
Iatz pendelt si öfter zwischa Gurnau und Wia,
si muaß decht ihr Enkali bsuacha giah!
Ou dr Neni geiht spaziara mit dr voller Stolz
si isch jo gschnitzt aus'm gleicha Holz.
Zu seim 60-er tia mar im Egon no nochträglich gratuliara,
und lossa a schiana Raketa marschiara.

Huber Susanne und Peter

Iatz lege miar zur Scheiba nou an Böller d'rzua
und kehra bei bar Susanne und dem Peter zua.
Vor Bäckerin zu Bänkerin, dös isch a Soch,
deas hot d'Susanne mit Bravour d'r mocht.
Long weards numma daura, noch weara si ins Richtung Grins verlossa,
weil sie fohrt iatz schua so oft auf Grins durch d'Lochgossa.
Uans muasch ins ober nou sogä,
wenn du mogsch, tian miar enk für a poor Euro weiter a Scheiba schloga.

Fam Huber Robert Gabi

Wenns ba ins kolt weard und es kimmt d'r Wind,
nocha rauscht d'r Hansrobert ob und dös gonz gschwind.
Im Burgenlond, Ägypten oder Kenia, ma waoß nia genau,
irgendwo holtet sich der Robert und Gabi au.
Dia Safari in Kenia hot das Robert im Herbst fasziniert,
drum hot er an wunschschians Fotoalbum kreiirt.
Über deas Lond woäß er sicher viel berichtä,
do kannt er jo gonzi Seite dichtä.

Fam Rainalter Eckehardt Hella

Im Ekki tian mar iatz als earschts amal zum 70er gratuliera,
und lassa dir a schiane Raketa aua marschiera!
In ihr Firmengebäude hoba die Hella und dr Ekki wieder fest investiert,
dia nui Fassade isch a Procht, des hot si rentiert!
Ober ou do in Gurnau isch ihna nuit z'viel,
da wella sie baua a Garage für ihr Pensionischten-Mobil.
Ekki, tua lei öfter mit dr Hella a Fahrtli mocha,
d'Fuierwehr losst enk no an Böller krocha.
Danke sog mar no dr Hella, weil si ins ollweil da Toag richtha tuat,
weil sinsch wara dia Kaskiachla lei holb so guat.

Scheiber Michael

Ja beim Michael gibts so viel zum berichta
dass i gar nit woas wo i anfangen sell zum Dichta.
Beim Schifahra und beim Fussballspielen isch er in topform,
und dass des so bleibt muas er trainiera ganz enorm.
In dar übriga Zeit was ihm da no zur Verfügung steahrt
muas er lerna für d' Schual wia es sich keahrt,
und das sie dir ou gelinga deine Socha,
lass mar no an Böller krocha.

Scheiber Markus

Dr Markus hat ou uan auf Soldat gmacht,
und als Koch det di Zeit verbracht.
Und kaum wara die 6 Monat vorbei
hat er an Job kriagt ou schu glei.
Beim Grissemann hat er an Job gfunda
und verbringt det seine Arbeitsstunda.
Mir hoffa dass es dir da guat gfallt
und dazu an Böller iatz laut knallt.

Scheiber Peter

D`r Peter isch Lokführer aus Leidenschaft,
und düst mit dem Zug durch's Lond mit voller Kroft.
Sei Motto lautet: volle Kraft voraus,
denn nach am strengen Arbeitstag, will er schnell nach Haus.
Ou in der Löschgruppe Graf Gurnau stellt er sein Monn,
als nui gwählter Vizepräsident zoagt er, wos er kann.
Die Scheiba wear mar iatz no weit auBa schiaBa,
und darmit dei Sprichli abschliaBa.

Scheiber Robert

D Martha und der Helli haba Dahuam iatz endlich mia Platz,
weil auszoucha isch iatz der älteschte Fratz!
Dr Robi tuat sich's iatz in Graf daußa gmiatli mocha,
und Udo`s Kassa hat ou was zum locha!
A nuie Stamm-Bar hat dr Robi ou schua gfunda,
und verbringt dett viele nette Stunda!
Im Winter tuat er in dera Wohnung nix versauma,
drum hat er Zeit bei seiner nuia Bar d 'Parkplätz zum rauma!
Falls se iatz nacha anfonga die nuie FuierwehrHalle zum realisiera,
kann der Robi den Bau vom Balkon aus inspiziera!
Miar hoffa du tuasch um Gurnau iatz it all zu sehr verdriaßa,
und tian dir auf deas aui a wunder schiane Scheiba bis zum Boch ocha schiassa!

Fam Scheiber Helmut Martha

Bei's Scheibers geacht iatz uaner weniger ein uns aus,
denn dr Robi wollt wohna in am eigena Haus.
Daraufhin isch Robis Zimmer glei deas vom Michi gwoara,
sinscht gang ja unnötiger Platz verlora.
D' Martha hot dann glei Michis Zimmer inspiziert,
und daraus für sich a netts Fernseh- und Yogazimmer kreiirt.
Dass deas Entspanna und Relaxen im nuia Zimmer guat gelingt,
die Scheiba iaz weit aucha singt.

Grießer Eva Maria

Die Eva hot´s in Düsseldorf mit ihrem Freind gonz fei,
und schaut ou ab und zua bei ins do vorbei.
Du hosch douba ou a nette Arbeit gfunda,
nu dein Freind kimmt dausa nit auf seine Stunda.
So hot er holt miasa noch ara Arbeit suacha,
und hot so gor bei ara Firma in Vorarlberg ongruafa.
Er hot vo deara Firma vorübergehend a Angebot kriagt,
Wo er iatz ou seine Stunda oa biagt.
Wenn alles passt kannt er do ou bleiba,
vielleicht kannt´s die wieder weiter zu ins hea dreiba.
Es wearats do sicher no a Lösung finda,
enkar Scheiba sett iatz in dar Sanna verschwindal!

Grießer Elisabeth

Für die Elisabeth isch's huira soweit,
es kimmt die Matura Abschlussarbeit.
Des gonze learna hot sich hoffentlich rentiert,
amol die erste Prüfung hosch schua guat absolviert.
Für den Rest der Prüfung wünsch miar no gutes gelingen,
auf des wer mar die Scheiba no weit oa schwinga!

Fam Grießer Hubert Rosmarie

S'letscht Jahr wor dr Hubert Strohwitwer für a Wocha,
hot miaßa den Hausholt schupfa und wohl ou kocha.
Di Rosi genießt drweil den Urlaub auf'm Schiff,
mit'm ua oder ondera Cocktail oder am Pfiff.
Und für den Foll, dass ma vielleicht seekronk weart,
hot si a Schnapsli mit, wia si des keart.
Weil no gnuag in dr Floscha isch drin,
lodet si a gonze Partie auf a Glasli in.
Alla hinter ihr noch marschiart si zu ihrem Zimmer,
ober wo des isch, hot si kuan Schimmer.
Di Rosi isch total verwirrt,
sie hot sich komplett auf dem Schiff verirrt.
Si suacht ihr Kabine di längschte Zeit,
ihr hintanoch di gonza Leit.
So a Navi auf dem groaßa Schiff, des war iatz der Hit,
des nimmsch s'nägschte Mol mitsomt dem Schnapsli mit.

Schmid Thomas

Dr Thomas hat 6 Monat beim Paras verbracht
und da den LKW-Führerschein gmacht.
Im Thomas mecht ma iatz no gratuliera
er tuat seit Herbst BWL studiera.
Zwischen Fuaßballspiela und fleißi studiera
geat er öfters zur Freindin auf Kappl spaziera.
Fürs Studium wünsch ma dir guats gelinga
und de Scheiba sell dir viel Glück bringa.

Schmid Daniel

Iatz wear mar no a Rakeita in Himmel aua schiaßa,
da Daniel well mar huira als insara nuia Kommandant begriaßa.
Ou privat hot er kuane leida,
nach der Uni hot er sich hold miasa für wos nuis entscheida.
Und iatz isch er beim "Master International Business und Law" drbei,
ma sigt ihn olli fleißig learna, des muas hollt ou sei.
Und mir hoffa dass mar ou in Zunkunft kenna auf die baua,
drum wear mar dei Scheiba no weit oa haua!

Fam Schmid Harald Angelika

Iatz lassa m'r glei a Raketa in Himmel auchi singa,
und auf'n Harald a großes Dankeschian ausbringa.
22 Jahr warsch Fuirwehrkommandant, ma tat's kaum globa,
da kannt m'r die für viele Sacha loba.
Auf Bewerbe sein m'r gfohra vom Außerfern bis ins Osttirol,
da war d'r mit d'r ganza Truppe wahrscheinlich nit immer ganz wohl.
Viele Stunda hasch für die Fuirwehr investiert,
aber seit huira an neuer Kommandat vorne Weg marschieret.
Ganz kimmsch ja deacht nit weck,
d'r neue Kommandant wohnt ja am gleicha Fleck.
Iatz lassa m'r no a zwoate Raketa in Himmel ganz wunderbar,
und mechta saga Dankschian für die ganza Jahr.

Fam Schmid Helmut Linde

Wenn d'r Helli mit da Buaba im Wold isch, - isch wos los, sall war decht g'locht.
do kimmt schua voar, daß sie so an Boum selbständig mocht.
So g'schecha oberholb von Rifenol,
wondert an Boum alluan Richtung Tol.
Dia Monnschoft schaut und kann nit tian,
nit amol vor ama Marterla bleibt der Prüg'l stiahn.
Dös tuat in Helli schuan a bissli irritiera
drum tuat er dös Marterli mit altem Bruggaholz wieder schian repariera.
Guat ausgonga, kenna miar lei sogu,
und tian zur Scheiba ou nou a Raketa auchijoga.

Juen Anna-Lena

Ja bei dr Lena tia mar anfanga mit da wichtiga Socha
und lassen als erstes an Böller krocha.

Sie hat gmacht da Führerschei
und isch im Winter im Postkeller immer live dabei.
Ihren Freind sieht ma mehr in Gurnau wia in Strenga,
tuasch uns die Lena ja hoffendlich fest verweina.
Sie isch beim Matura mocha und dass des ou gelingt
iatz no a Scheiba weit ocha singt.

Juen Johannes

Noch'm Führerschein a Auto koufa, do hot dr Jonny nit viel Zeit versaumt,
und drfür ou sei Konto graumt.

Für an Seat Ibiza hat er sich entschieda,
und isch mit seiner Entscheidung guat z'frieda.
Im Summer wor er in Velden im Kärntnerlond,
do hot er da Gäscht aufkocht ollerhond.
Die Kucha im Höllroah isch iatz sein nuis Revier,
in Koppl drin haut er auf die Schnitzel aucha di Panier.
Miar wünscha dir no viel Gschick im nuia Jahr,
iat' z'fliagt no a Raketa aucha wunderbar.

Juen Julia

Abwechslung braucht dr Mensch im Leba
denkt sich die Julia und bleibt nit an uam Orbeitsplotz kleba.
Guate Leit kann ma überoll braucha,
drum kurvt die Julia iatz jeden Tog noch Serfaus aucha.
Do geiht in dr Saison di Poscht ob, nit nu beim Schifohra,
ou beim Inkoufa tia di Gäscht nit spora.
D' Julia, die Blondine mit Verkaufstalent,
schaut, dass beim Sport Patscheider dr Rubel rennt.

Fam Juen Hubert Erika

Dass am Hubert und dr Erika nit Longweilig weart,
sei die beade fleißig auf dar Arbeit so wia sich´ s keart.
D' Erika siagt ma beim Bipa hinterm Regal ausa locha,
und dr Hubert tuat sein Job bei dr Polizei ou super mocha.
Jo dr Hubert hot schua a paar Verbrecher das fürchten glehrt,
und huira hoba sie ihn mit dar silberna Verdienstnadel der Rebuplik dafür geehrt.
Und im Summer siegt ma enk olli fleißig s´ Ha in tia,
da bleibt sicher ou kua Grasli stia.
Miar hoffa es tiat´ s so weiter mocha,
iatz loss mar no an Böller für enk krocha!

Fam Juen Josef Paula

Am Seppl well mar, wia alla Johr vergals gott sogä,
dass mar derfa insre Scheiba über dei Wiesa oa schloga.
Und iatz so hom mars keart,
dass es im Seppl gsundheitlich schua wieder besser geat.
Ou Paula neba da Viecher alli eppas tuat,
ou beim Schnapsbrenna isch sie im Element und so des Schnapsli weart ou guat.
Jo miar hoffa dass enk s´ nui Johr viel Gesundheit bringt,
auf dess enkar Scheiba no weit oa singt!

Fam Siegele Waldemar & Ruth

Normalerweis war ja Lebensmittel inkoafa immer Frauaangelegenheit
aber iatz isch fast in jedem Haushalt die Emanzipation schua sehr weit.
Ou dr Waldemar geat iatz jeden Freitag nach Landeck außa
um am Frischemarkt durch alle Standla zum sausa.
Mittlerweile hot sich da daußa fascht an Stammtisch etabliert
wo ou der Waldemar alli fescht mitdiskutiert.
Tua lei d' Einkaufszettel nit vergessa
sinsch kriagsch dahuam eppa kua Mittagessa.

Autohaus Maschler

Beim Maschler tia vor seim Autohaus parka,
Waga von an Haufa verschiedene Marka.
Mit Citroen, Seat, Mitsubishi und Fiat kann ma probefohra,
für jeden wos, ob ma will protza oder muaß spora.
Scharfe Sonderangebote wie beim Seat des "Chili",
do sogt an Käufer glei amol, den will i.
Und earsch vom Mitsubishi der Evolution
mit dem Rallye-Auto kann Mann sei Ego puschen.
D'Feuerwehr hot a Raketa für enk kouft,
dass s'Geschäft weiterhin guat louft.

Fam Juen Klaus Anna

2012 wor a Jubiläumsjahr,
aber a ganz spezielles für enk deas isch wohr.
Vor 50 Jahr hoba sie sich das Jawort geba
und deas isch, mir mechta da fast saga, länger als a halbs Leba.
So lang gia sie schua gemeinsam Hand in Hand
und die Ehe hot immer no Bestand.
Mir als Feuerwehr darfa enk ou dazua gratuliera
und lossa speziell dafür a Raketa marschiera.

Thöni Maria

Deas Jahr hot Maria a bisli Pech ket
sich weachtan isch doch immer a Gfret.
Den Arm hot sich d' Maria brocha
mit sowas geats holt ou nit leicht zum kocha.
So tuat sie sich iatz mit "Essen auf Rädern" verwehna
aber tua die lei nit dran gewöhna.
Die Feuerwehr wünscht dir gute Besserung und mehr Glück in nächster Zeit
drum schiaß mar dia Scheiba iaz außa richtig weit.